



Agnul Michêl Pitane o Agnul di Spere (1930-2005), nassût a Sedean, inzegnâr lât emigrant par tancj agns in Svizare, al è stât une des figuris plui nobilis e claris de leterature e de culture furlane des ultimis desenis di agns. Tant che sostignidôr ferbint de lenghe e de nazion furlane, ce che lu caracterizave e che lu distingueve intun ambient conflituâl e jere la manciance totâl di agressivitât, la bontât naturâl e insiemi une fuarce straordinarie, fondade su la sinceritât cun se stes e cun chei altris: cheste fuarce lu à puartât a diventâ un pont di riferiment pai furlans tal forest e po dopo pai scritôrs di chenti che al à dât dongje, dal 1982, te Union Scritôrs Furlans. Tant che poete al à publicât *Semantiche dal flaut*, 1975, *Un istât*, 1979 e 1996, *Chês flamis*, 1988, *Lis paveis di Plasencis*, 1992, *Impressions, visions*, 1997. Al è stât ancje tradutôr e al à publicât oparis terminologjichis, fintremai al è stât il prin president dal CFL2000. Tant che scritôr di contis curtis al à publicât dal 1983 *Il sît di Diu* e po dopo altris contis ca e là, ancje in “La Comugne”. Il furlan di Agnul di Spere al è un model impuartant: al mostre une ricercje cussiente, che cualchi volte e sielç l’iperpurisim, testimoniant une fase storiche de lenghe furlane culte, vivarose plui di dut tai agns Setante e Otante.

La sô prose, spieli de sô personalitât, e je soâf, lizere ma profonde, no à presunziions e cun contignûts che a somein minimis e fevele drete ae anime dal letôr.

Scrit dal Camarîr de Ostarie